

Llyr Gruffydd
Cadeirydd y Pwyllgor Cyllid
Cynulliad Cenedlaethol Cymru
Drwy e-bost

20 Tachwedd 2018

Cynllun Ymadael Gwirfoddol (VES) Comisiwn y Cynulliad 2018

Annwyl Llyr,

Yn ymddangosiadau'r Comisiwn gerbron y Pwyllgor Cyllid a'r Pwyllgor Cyfrifon Cyhoeddus yn ddiweddar, gofynnwyd i mi am y posibilrwydd o gynnig Cynllun Ymadael Gwirfoddol (VES). Rwyf nawr yn ysgrifennu i gadarnhau, yn ei gyfarfod ar 5 Tachwedd, y cytunodd y Comisiwn i gynnig Cynllun Ymadael Gwirfoddol (VES) i'r holl staff.

Bydd y Cynllun Ymadael Gwirfoddol yn helpu i sicrhau y gall y Comisiwn barhau i ddarparu'r sgiliau, yr arbenigedd a'r gallu angenrheidiol i gefnogi'r Cynulliad drwy'r heriau penodol a ddaw yn sgîl Brexit a Newid Cyfansoddiadol, tra'n parhau i weithio, cyhyd ag sy'n bosibl, o fewn cap cyffredinol y sefydliad o 491 o swyddi.

I grynhoi, nodau'r Cynllun Ymadael Gwirfoddol fydd:

- caniatáu i'r Comisiwn ymateb i newidiadau yn y gofynion o ran sgiliau ac arbenigedd;
- hwyluso newid sefydliadol, gan gynnwys o fewn timau penodol;
- gwella effeithlonrwydd y gweithlu; a
- phan fo hynny'n bosib, darparu arbedion hirdymor ac osgoi cynyddu maint y sefydliad wrth ddiwallu anghenion o ran adnoddau.

Rydym yn bwriadu lansio'r Cynllun Ymadael Gwirfoddol ar 22 Tachwedd 2018, a bydd y cyfle i wneud cais yn agored tan ddechrau mis Ionawr 2019. Bydd y cynllun yn cael ei gynnal yn unol â rheolau'r Swyddfa Gabinet / Trysorlys a bydd ganddo feini prawf asesu a



phrosesau penderfynu cadarn. Byddwn yn cymryd i ystyriaeth lawn yr argymhellion sy'n deillio o'r adolygiad archwilio mewnol o'n cynlluniau blaenorol ac o adolygiad ehangach Swyddfa Archwilio Cymru o gynlluniau ymadael. Mae ochr yr Undebau Llafur (TUS) wedi cael gwybod am ein bwriad i gynnig Cynllun Ymadael Gwirfoddol, a bydd yn cael ei wahodd i arsylwi ar waith y panel dethol.

Ystyriwyd y goblygiadau ariannol yn ofalus ac rydym wedi nodi cyllideb o hyd at £800,000. Gallaf gadarnhau y gellir cyllido'r gyllideb hon o danwariant o gyllideb staffio weithredol y Comisiwn, sydd, i raddau helaeth iawn yn deillio o lefelau uwch na'r arfer o drosiant staff. Mae'r gyllideb hon yn debyg i'r gyllideb o £850,000 a bennwyd ar gyfer Cynllun Ymadael Gwirfoddol 2015, a neilltuwyd £650,000 o hon. Pennodd Llywodraeth Cymru gyllideb o £5.5 miliwn ar gyfer ei Chynllun Ymadael Gwirfoddol diweddaraf.

Yn olaf, bydd costau'r cynllun yn cael eu cyhoeddi fel rhan o'r Adroddiad Blynyddol a Chyfrifon 2018-19, ym mis Gorffennaf 2019.

Mae croeso ichi gysylltu â mi os oes gennych unrhyw ymholiadau, neu os hoffech gael rhagor o wybodaeth.



Manon Antoniazzi

Prif Weithredwr a Chlerc

Cynulliad Cenedlaethol Cymru

Croesewir gohebiaeth yn Gymraeg neu'n Saesneg / We welcome correspondence in Welsh or English.

